




میلہ سخی

مینڈھر شہر تھیں کوئی چار میل دور سخی میدان اک خوبصورت وادی تہ
تاریخی مقام ہے جس نے چواں پاسے آسمان کی ہتھ لانے آئے اُچے اُچے
پہاڑ ہیں۔ ہر پاسے ہریالی ہی ہریالی ہے تہ قدرتی حُسن نال ایہہ علاقہ
پہر پور ہے۔ اس وادی نے اکس چوکے بچ حضرت سخی سرورؒ نی بیٹھک ہے۔
کسے زمانے بچ کورو تہ پانڈواں وی اس کی اپنا کھر بنایا سی۔ اُنہاں نے نشان
اج توڑیں وی موجود ہیں۔ بڑے بڑے پٹ لائی تہ اک بڑے تکلے نے چواں
پاسے اک کندھ بنائی۔ اک کھوہ گھنیا جیہڑا بہوں ڈوہنگا ہے۔ اج وی لوک
اُس بچ گیٹیاں سٹی تہ اُس نی ڈوہنگیائی نا اندازہ لانے ہیں۔ کورو تہ پانڈواں

نی نشانی بچ اک پتھر ناں صندوق اج وی انہاں نی یاد دلانا ہے۔ انہاں تھیں بعد حضرت سخی سرورؒ اس جگہ کی چُنیا۔ حضرت سخیؒ نے ناں ور اس ناں سخی میدان پیا۔ حضرت سخی سرورؒ اپنے زمانے نے مشہور صوفی سُن۔ انہاں کی اس علاقے بیاں کھیڈاں نال خاصی دلچسپی تہ لگاؤ سا۔ انہاں مذہب اسلام نے پھیلاؤ نے نال نال مقامی کھیڈاں کی وی زندہ رکھنے بچ بڑا اہم کردار ادا کیتا۔ اپنے دور بچ حضرت ہر سال ساون نے چن نی یاراں، باراں تہ تیراں تاریخ کی اک میلے نامنڈھ رکھیا، جس بچ سارے علاقے نے لوکاں کی اکٹھا کری ٹھولاں تہ شرنا بیاں نے سنگ بکھ بکھ دیسی کھیڈاں کھیڈنے نا حکم دتا۔ انہاں کھیڈاں بچ بانہہ یا بنی پکڑنا، بگڈ ریاگٹی چانا، کبڈی کھیڈنا، گشتی کرنا، گتکا کھیڈنا شامل سا۔

ایہہ میلہ اج وی جاری و ساری ہے ہور پورے علاقے نی شان ہے۔ سخی پیر میلہ اج وی ہر سال ساون نے چن نی یاراں، باراں ہور تیراں تاریخ کی لگاتار منایا جانا ہے۔ پہلے دن جدوں میلے نی شروعات ہونی ہے، سب تھیں پہلاں اک بکرا حلال کری دُعا کیتی جانی ہے۔ سارے لوک اکٹھے ہوئی دُعا منگنے ہین، فرٹھل چاٹری جانی ہے۔ ایہہ ٹھل اک لُمی سار سنگ بنھی

اک کہوئے نے بوٹے ور بہوں اُچی ٹنگی جانی ہے۔ ایہہ ٹہل اتنی اُچی ہونی ہے جے دور دور علاقیاں بچوں صاف نظر آنی ہے۔ فر میلے نی مکمل شروعات ہوئی جانی ہے۔ ہر پا سے رونق ہی رونق ہونی ہے۔ جلیبی، پکوڑے ہر قسم نے پھل، ٹھنڈے شربت، رنگ رنگ نیاں ہور مختلف قسم نیاں مٹھائیاں جگہ جگہ نظر اچھنیاں ہین۔ اس بڑے تلے بچ جگہ جگہ پہنگوڑے لگی جانے ہین، جیہڑے دیسی قسم نے بنے ہوئے ہونے ہین۔

بچے ہور جوان پوری تیہاڑی انہاں پہنگوڑیاں ور مزہ کرنے رہنے ہین۔ بگڈر سر تھیں اُپر دوواں ہتھاں ور تھمنے ہین۔ اس بگڈرنا وزن کہٹ تھیں کہٹ ترے (۳) من ہونا ہے۔ اس تھیں بعد ہر پا سے ٹھولاں ور بیسا کھی بجائی جانی ہے تہ فر بانہہ یا بنی پکڑی جانی ہے۔ جیہڑا بانہہ ڈکی چھوڑے اُس کی موہنڈیاں ور چائی سارے میدان بچ پھیریا جانا ہے۔ فر ہور جوڑی کڈھی جانی ہے۔ اسے طراں ایہہ سلسلہ پیشی توڑیں چلنا رہنا ہے۔ اُس تھیں بعد کبڈی کھیڈی جانی ہے ہور آخر بچ گشتی۔ اس طراں ایہہ میلہ برابر (۳) تیہاڑے پورے علاقے کی رونق بخشنا ہے۔ شام ویلے ٹھلاری ساریاں سامان بیچنے والیاں کول جاتی تہ اپنا حصہ کہنتا۔

سنہ ۱۹۴۷ء تھیں پہلا اس میلے پنج لاہور تک پہلوان تہ لوک میلہ تکنے
واسطے اچھنے ہونے سن، پر ہُن ایہہ سلسلہ مکی گیا ہے، تاہم فروی اج پنجاب
توڑیں نے پہلوان اپنی پہلوانی نے کرتب دہسن واسطے اس میلے پنج آنے
رہنے ہین۔

1۔ اوہکھے لفظاں نامطلب:

بیٹھک : بیٹھنے دی جگہ

اُچے اُچے : بلند اونچے

بگدر : اک پتھر جیہڑا کہڑا گیا ہونا۔ اس کی پہلوان تھمنے ہین

پیشی : اک بجے تھیں بعد نا وقت

موہنڈا : کندھا

کرتب : کمال، فن

2۔ مندرجہ ذیل سوالاں نے جواب دیو:

- (۱) حضرت سخی سرورؒ نے بیٹھک کیہڑی جگہ ہے؟
- (۲) سخی پیر میلہ کیہڑی تاریخ کی شروع ہونا ہے؟
- (۳) اس میلے پنج کیہڑیاں کیہڑیاں کھیڈاں کھیڈیاں جاناں ہین۔
- (۴) سخی پیر نے مقام ورکورو تہ پانڈواں نیاں کیہڑیاں نشانیاں موجود ہین۔

3۔ خالی جگہاں کو مناسب لفظاں نال پھرو:

- (۱) سخی میدان مینڈھر شہر تھیں..... میل دور ہے۔
- (۲) سخی میدان ناناں..... نے ناں پر پیا ہے۔
- (۳) سخی میدان ضلع..... پنج پایا جانا ہے۔
- (۴) سخی میدان پنج..... من نا بگدر موجود ہے۔
- (۵) اُتھے کھوہ ہے جیہڑا بہوں..... ہے۔

